

## 2 TIMOTI

### Pol kivuu kipihac wê vông yuu ge la vô Timoti

<sup>1</sup> A, Pol, Anutu vînoo a ên nêb a tu Yesu Kîlisi nu sinale. Ilage Anutu hîlu kiyang pyap bêga ên nêbê xomxo wê vông i vin Yesu ge obêc dô maviha luta lêc luta. Om Anutu xovô kiyang wê hîlu pyap ge di vông yuac sinale vô a ên nêb a la nêl Yesu Kîlisi kiyang kitong.

<sup>2</sup> Timoti, a kivuu kipihac tiga vô ông. Ông ge a nug vông vinên wê a xêgyaa vin lec ông ge. Mag Anutu hixôn il lig Apumtau Yesu Kîlisi, yuu i xo vîgwe pisiv ên ông di vông vîzid nivîha hixôn kiyang malehe i loc vô ông.

#### *Il nid ob yoc ên xolac lêm*

<sup>3</sup> A mi timu vô Anutu môp di vông i yuac tiyi xochê a mage buge vông ilage, di nipaên ti o yêp vac a nîlôg lêm. Timoti, a xo ông di a pîmil Anutu ên ông vac kitaaên wê a kitaa vidiiên yuu bucên vihati ge. <sup>4</sup> Di a xo wê ông byag vô buc wê a sea ông ge, om a nêb a ob lôc vô ông i tii vac ên i vông a nîlôg i vô nivîha. <sup>5</sup> A xovô ên a nêbê vông vinên wê ông vông ge nôn di o kityooên lêm. Ilage ông bum vêx Lois yuu tam Yunis vông i vin tibêge, om a xovô ên a nêbê gwêbaga vông vinên wê ông vông ge tiyi xochê yuu vông ge. <sup>6</sup> Om a ob nêl vô ông bê ông xovô xêkizêc wê Anutu vông vô ông ilage i tii vac.

Ông kô xêkizêc tige vô buc wê a vyax vigêg lec ông ge. Om gwêbaga ông kô xêkizêc tige di vông yuac ya. <sup>7</sup> Ên Anutu o vông môm xonaên vô il lêm. Nge, vông xêkizêc wê i vông ge vô il di vông môm xêyaa vin lecên vô il, di vông il nilôd xovô môm yuu kiyang nivîha ên nêb il timu vô.

<sup>8</sup> Anutu vông xêkizêc wê i vông ge vô il, om ông nim i o lêc yoc ên Apumtau Anutu kiyang wê ông ob nêl ge lêm. Di ông nim i o lêc yoc ên a ên wê tibii tung a lam dô vac kalabuhu lec Apumtau lê ge lêm. Nge, ông kilê viyin lec xolac hixôn a, di le xêkizêc vac viyin tige ya xêkizêc wê Anutu vông vô ông ge. <sup>9</sup> Anutu vô il vêl ên il nêd nipaên di tyuc il ên nêb il timu vô môm ngibua wê i vông ge. Lêc o vô il vêl ên il nêd nipaên ên yuac ti wê il vông ge lêm. Nge, ilage wê Anutu gên o tung lag yuu kibun lêm ge, od ici va xo vigwe pisiv ên il di xovô pyap ên nêb Yesu Kîlisi ob yib ên il nêd nipaên. <sup>10</sup> Di gwêbaga môm wê Anutu xo vigwe pisiv ên il ge yêp seac vô il, ên wê Yesu Kîlisi lam yib di vô il vêl ên il nêd nipaên ge. Yesu kitya xêkizêc wê yibên vông ge vêl di vông xolac nivîha vô il ên nêb kiyang wê nêbê il ob dô madvîha luta ge i yêp seac vô il.

<sup>11</sup> Anutu vinoo a ên nêb a tu sinale di la nêl xolac vô xomxo di tixuu he ya xolac tige. <sup>12</sup> A vông yuac tibêge om tibii vông viyin wê a tulec gwêbaga ge vô a. Lêc a nig o yoc ên viyin tige lêm, ên a xovô xomxo ti wê a vông i vin i ge, di a xovô ên a nêbê xomxo tyo tîyi wê ob viac yuac wê vông vac a vigêg ge i tîyi buc vîhati di i miloc vô buc wê Yesu obêc vena lec ge.

<sup>13</sup> Ông timu vô kiyang nôn wê a nêl vô ông mi ông ngô ge, di vông i vin Yesu Kîlisi xêkizêc ta, di ông xêmyaa i vin lec i, ên ông tu Kîlisi xe pyap.

<sup>14</sup> Myakilôhô Ngibua dô vac il nilôd, om ông viac kiyang nôn wê Anutu vông vac ông vigêm ge i nivîha ya xêkizêc wê Myakilôhô Ngibua vông ge.

<sup>15</sup> Timoti, ông xovô pyap ên ông nêbê Piselas yuu Hemosenis hixôn xomxo vông vinên vihati wê dô vac vigwe levac Esia ge, he sea a. <sup>16</sup> Lêc Onesipolas ge, a kitaa vô Apumtau lec i bêga bê i xo vigwe pisiv ên Onesipolas yuu vinê di nue, ên mi ngîdu a xôn di vông a nilôg vô nivîha lu tibeac di ni o yoc ên wê a lam dô vac kalabuhu ga lêm. <sup>17</sup> Nge, buc wê Onesipolas val vigwe Lom ga ge od vông yuac levac lec myagên a mi val yêvô a. <sup>18</sup> Om a kitaa vô Apumtaubêga bê i xo vigwe pisiv ên Onesipolas vô buc timuên wê Yesu obêc vena ge. Ông xovô pyap ên ông nêbê buc ilage wê a la dô Epesas ge Onesipolas mi ngîdu a xôn ya môp nivîha tibeac.

## 2

### *Il tiyi xocbê Yesu Kîlisi nue vevac*

<sup>1</sup> A nug Timoti, Yesu Kîlisi vông vizid nivîha vô ông pyap om ông hôm vizid wê i vông ge xôn pilihi di le xêkizêc ya. <sup>2</sup> Kiyang vihati wê a nêl vô xomxo tibeac di ông ngô hixôn ge, ông vông kiyang tigege vô xomxo wê ob ngô di viac nivîha ge ên he i loc nêl kiyang tigege vô xomxo ya ên he i ngô hixôn.

<sup>3</sup> Ông le xêkizêc i tiyi xocbê Yesu Kîlisi nu vevac ti wê vông i yuac nivîha ge, di ông kilê

vîyin hixôn xe lec yuac tige. <sup>4</sup> Xomxo ti wê kô yuac vevac ge ob vông yuac bangwe hixôn lêm. Nge, ob vông nilô vô yuac vevac tived ên nêb tibii levac wê viac i ge i yê yuac wê i vông ge nivîha. <sup>5</sup> Dî xomxo ti obêc nêb tup mi nginoo ge od ob tup i tiyi môp wê ob kô nôn ge. Ên obêc ma ge od ob mîla kô nôn wê tup ên ge lêm. <sup>6</sup> Dî xomxo ti obêc xin vê vac yuac dî viac yuac nivîha ge od ob kô nôn mi ya tax. <sup>7</sup> Om ông xovô kiyang tiga wê a nêl ga, ên Apumtau ob vông xovôên vô ông ên ông xovô kiyang vihati kehe.

<sup>8</sup> Ông xovô kiyang lec Yesu Kîlisi i tii vac. Yesu pum lec Devit dî yib dî kidi lec maviha vac yibên. Kiyang tiga xolac nivîha wê a mi nêl ge. <sup>9</sup> Lêc tibii yê a nipaên ên xolac tige, om vông vîyin vô a dî ku a xôn ya sen dî vông a lam dô vac kalabuhu ga tiyi xocbê tibii nipaên ti. Lêc he tiyiên ma wê he ob ku Anutu kiyang xôn ge. <sup>10</sup> Mêgem a le xêkizêc ta vac vîyin, ên a nêb xomxo wê Anutu vînoo he ên nêb he i tu i nue ge he i ngô xolac dî vông i vin Yesu Kîlisi dî dô maviha hixôn i vac Anutu ben lag puunê luta lêc luta.

<sup>11</sup> Kiyang tiga nôn bêga ên nêbê

“Il obêc xib hixôn i ge od il obêc dô madviha hixôn i. <sup>12</sup> Il obêc le xêkizêc vac vîyin ge od il ob tu levac mî dô hixôn i. Lêc il obêc yax i vun ge od i êno ob yax il vun. <sup>13</sup> Il obêc sea vông vinên wê il vông ge od i ob sea il lêm, ên o tiyi wê ob pilepac kiyang wê i vông ge lêm.”

*Xomxo wê vông Anutu yuac vô nivîha ge*

14 Ông nêl kiyang tige vô xomxo ên he i xovô i tii vac nang, di ông le Apumtau manôn di nêl vô he bê he i o lêc vông vevac vôma lec kiyang vaxvax lêm, ên môp tibêge ob vô nôn nivihha vô he lêm. Nge, ob vông he wê ngô kiyang tige vô nipaên.

15 Ông vông yuac nivihha ên Anutu i yê ông nivihha i tiyi xochê i nu yuac ti wê ông nêl xolac wê nôn ge bôbac di ông nim o yoc ên yuac tige lêm ge. 16 Ông kol ông ên kiyang vaxvax wê nôn maên ge. Ên kiyang tige ob didii xomxo la vac nipaên di he ob vô nimi vô Anutu kiyang, di ob vông môp tige vô levac. 17 Kiyang nipaên wê he nêl ge ob vô levac tiyi xochê kityax wê ob vô levac mi ya xomxo ninivi ma vêl ge. Haimenias yuu Pailitas, yuu mi vông bêge. 18 Yuu sea kiyang nôn di nêl kiyang kityooên bêga ên nêbê, “Il kidi lec vac yibên pyap.” Yuu mi nêl bêge mi xomxo vông vinên ya ngô, om vông vinên wê he vông ge vô nipaên. 19 Lêc Anutu xolac le xêkizêc xochê teac le xêkizêc ge. Xolac bo ti nêl bêga ên nêbê, “Apumtau xovô xomxo wê tu i nue ge pyap.” Di ngwe nêl bêga ên nêbê, “Xomxo ti obêc nêl ên nêbê i tu Apumtau nu ti ge od i vô nimi vô môp nipaên vihati.”

20 Vac xumac levac ti pile yuu dêg wê silva yuu gol ge vaci o dô vac lêm. Nge, dêg kibun yuu pile xax le vac hixôn. Dêg yuu pile ya vông yuac nivihha, di ya dô vaxvax. 21 Mêgem xomxo vông vinên ti

obêc vô nimi vô kiyang yuu môp nipaên di dô nivihha ge od tiyi xochê pile yuu dêg wê vông

yuac nivuha ge, ên xomxo tige vông nilô la vô Apumtau di viac i pyap tiyi wê ob vông yuac nivuha wê Apumtau vông vô i ge vihati.

<sup>22</sup> Om ông le teva ên môt nipaên vihati wê yêp vac xam ngivihî nilôm ên xam nêb xam ob vông ge. Di ông vông nilôm i loc vô môt nivuha, di môt vông vinên, di môt xêyaa vin lecên, di môt malehe hixôn. Om ông hixôn xomxo vihati wê xam xôn nilôm vô paha lec di xam kitaa vô Apumtau ge, xam vihati timu vô môt tibêgee.

<sup>23</sup> Ông kol ông ên kiyang vaxvax wê xovôên nivuha ti o yêp vac lêm ge, ên kiyang tibêge wê ob vông xomxo kunacma di vông vevac vômâ.

<sup>24</sup> Xomxo ti obêc tu Apumtau nu yuac ge od i o vông vevac vô xomxo ya kiyang lêm. Nge, i lum nêl kiyang vô xomxo di tixuu he i nivuha ya xolac, di xêyaa i o vô myavinê vô xomxo wê vông viyin vô i ge lêm, <sup>25</sup> di i lum nêl kiyang vô he wê vông vevac vô xolac ge di titô he, ên mêd Anutu ob vông he pilepac he di he ob xovô kiyang nôn.

<sup>26</sup> Ilage Seten ku he xôn vac leac wê i vông ge di vông he timu vô ici va kiyang. Lêc he obêc xovô Anutu kiyang nôn ge od he piyôp obêc yêp nivuha di he ob sea leac wê Seten ku he xôn ya ge.

### 3

#### *Môt nipaên wê ob val vô buc timuên ge*

<sup>1</sup> Ông xovô bêga bê vô buc myahipu ge od viyin tibeac obêc val. <sup>2</sup> Ên xomxo ob timu vô môt nipaên bêga nêbê he ob xovô heche va, di he ob doma vô mone, di he ob yong heche va

lê, di he ob kô he lec vô xomxo, di he ob nêl xomxo lê nipaên, di he ob vô ninya kitu vô tae mae, di he ob pîmil xomxo wê ngidu he xôn ge lêm, di he ob la vac Anutu kiyang kwa ngibi lêm, <sup>3</sup> di he ob vông nivîha vô lie lêm, di he xêyaa ob vô myavîné lec kiyang di hôm xôn, di he ob nêl kiyang nimi vaxvax, di he ob kol he ên môm nipaên wê he ninivi xovô ge lêm, di he ob vông xomxo vô nipaên, di he ob vông vevac vô môm nivîha vîhati, <sup>4</sup> di he ob kityoo lie di vông he la vac xomxo nipaên vîgê, di he ob timu vô pîyôp nipaên wê he vông ge lutibed, di he ob xovô heche va ên nêbê he xomxo levac, di he xêyaa ob vin lec Anutu lêm. Nge, he xêyaa ob vin lec môm toto wê ninivi xovô ge, <sup>5</sup> di he ob yê da di kitaa lê, léc he nêl vac mya pîleva, ên he vô nimi vô Anutu hixôn xêkizêc wê i vông ge. Timoti, ông le teva ên he wê mi vông môm nipaên tibêgee. <sup>6</sup> Ên he ya nêl xolac kityooên vô vêx wê o vông i vin xêkizêc lêm ge. Vêx tîgee mi vông môm nipaên wê vông he nilô vô vîyin ge, di he vông pîyôp la vô kiyang nipaên tîbeac. <sup>7</sup> Vêx tîgee mi ngô kiyang vîyang vîyang ge ên nêb he ob kô xovôên lec, léc he o tîyi wê he ob xovô kiyang nôn ge lêm. <sup>8</sup> Ilage vux yuu lê nêbê Janis yuu Jamblis, yuu vông vevac vô Moses vac vîgwe Isip. Di gwêbaga xomxo tîgee wê nêl kiyang kityooên vô vêx ge he tîyi xocbê Janis yuu Jamblis, ên he vông vevac vô kiyang nôn, di pîyôp wê he vông ge vô nipaên di he sea vông vinên wê nôn ge. <sup>9</sup> Léc môm kityooên wê he vông ge ob vô levac lêm. Ên xomxo ob yê môm wê he vông ge ên nêbê môm yacyac, tîyi

xocbê xomxo yê môm wê Janis yuu Jamblis vông ilage ên nêbê môm yacyac.

*Pol nêl vô Timoti ên nêb i hôm Anutu kiyang xôn pilihi*

<sup>10</sup> Ông dô hixôn a ila, om ông xovô kiyang pyap wê a tixuu xomxo ya ge, di ông xovô môm vihati wê a mi timu vô ge, di piyôp wê a vông ge, di môm vông vinên wê a vông ge, di ông xovô wê a mi lum nêl kiyang malehe vô xomxo, di a xo vîgwe pisiv ên he, di a le xêkizêc di kilê viyin vihati, <sup>11</sup> di ông xovô môm nipaên vihati wê tibii vông vô a ge hixôn viyin levac wê tulec a vac vîgwe Antiok yuu Aikoniam yon Listla ge. A tulec viyin yuu myavinê mabu yocên, lêc Apumtau vô a vêl ên viyin tige vihati. <sup>12</sup> Vixôhilôg nôn, tibii ob vông viyin yuu myavinê vô xomxo vihati wê nêb ob timu vô môm wê Yesu Kilisi vông ge. <sup>13</sup> Di xomxo nipaên hixôn xomxo kityooên ob vông môm nipaên vô levac, di nipaên wê he vông ge ob viyum he xôn, di he ob kityoo xomxo tibeac, lêc Seten ob kityoo he.

<sup>14</sup> Lêc ông mô, kiyang nôn wê ông kô di vông i vin xêkizêc ge, ông hôm kiyang tige xôn pilihi, ên ông xovô xe vêx yuu vux wê xe tixuu ông ya kiyang tige, <sup>15</sup> di ông xovô ên ông nêbê ilage ông gên dô nipwo, lêc ông kô xovôên lec Anutu kiyang di i val tyip lec gwêbaga hixôn. Anutu kiyang tiyi wê ob vông xovôên vô xomxo ên he i vông i vin Yesu Kilisi di i kitya he nên nipaên vêl. <sup>16</sup> Anutu kiyang vihati wê yêp vac kipihac xolac ge, Anutu vaci vông vô xomxo mi he kivuu. Anutu kiyang tige nivîha tiyi wê ob vông xovôên

vô il, di ob hîlung il nêd nipaên vô il, di ob titô môm wê il vông ge, di ob tixuu il ya môm wê Anutu yê nêb nivîha ge. <sup>17</sup> Om Anutu vông xolac vô il ên nêb i vông xovôên yuu xêkizêc vô il wê Anutu nue ge tiyi wê il ob vông yuac nivîha vihati ya ge.

## 4

*Pol nêl vô Timoti ên nêb i nêl Anutu xolac nôn kitong*

<sup>1</sup> Yesu Kîlisi obêc yaxên xomxo vihati nên kiyang, he wê dô maviha hixôn he wê yib ge, di Yesu Kîlisi ob vena le seac di tu xomxo vihati nên levac wê ob viac he luta ge. Om a le vô Anutu yuu Yesu Kîlisi manôn di a nêl vô ông bêga bê <sup>2</sup> ông nêl Anutu kiyang i tiyi buc vihati, di xomxo ob nêb ngô me ngôên obêc ma ge od ông nêl xolac vô he. Ông nêl xolac vô he i tiyi wê he ob ngô mi xovô di vông i vin, di ông nêl he nên nipaên kitong vô he ên i kitiv he nilô di he i pilepac he vêl ên môm nipaên wê he vông ge, di ông nêl kiyang wê ob ngidu he xôn ge, di môm wê ông ob lum nêl kiyang vô xomxo di tixuu he ya xolac ge, le i lêc sea môm tige lêm. <sup>3</sup> Ên obêc buc timuên ge od xomxo ob nêb ngô kiyang nôn lêm. Nge, he ob timu vô môm wê heche va xovô ge, di vinoo xomxo wê ob tixuu he ya kiyang vaxvax wê he ngô nêb nivîha ge. <sup>4</sup> Di he ob vô nîmi vô kiyang nôn di vô nînya vô kiyang wê pivulac pileva ge. <sup>5</sup> Lêc ôcông va, ông piyôp i yêp nivîha i tiyi buc vihati, di ông kilê viyin, di ông loc nêl Kîlisi kiyang vô tibii madîluhu ên he i ngô di vông i

vin. Yuac wê Anutu vông vac ông vigêm ge, ông vông yuac tige vîhati i vô nôn lec.

<sup>6</sup> Ên a ga, tîbii madîluhu nêb ob hi a xib, om a hi ob kîpyax sea di a ob tu xocbê daa vô Anutu. Om buc wê a ob xib di sea kibun ga ge vô kwabo lec. <sup>7</sup> Vevac nivîha wê a vông ya xolac ge, a vông pyap. A tup vac môp vông vinên di la tiyôô lec myahîpu. Di a o sea vông vinên wê a vông ge lêm. Nge, a hôm xôn pîlihi. <sup>8</sup> Om Apumtau viac nôn nivîha pyap ên nêb a ob kô. Nôn tige bêga nêbê i ob yê a nêb a xomxo nivîha. Om Apumtau wê yaxên xomxo ya môp bôbac ge obêc vông nôn tige vô a vô buc wê obêc vena lec ge. Lêc ob vông vô aca va tîbed lêm. Nge, ob vông vô xomxo vîhati wê he xêyaa vin lec ên nêb he ob yê i vô buc wê obêc vena lec ge.

### *Kiyang viwen timuên*

<sup>9</sup> Timoti, ông seb lam vô a lutîbed, <sup>10</sup> ên Klesens la vigwe Galesia, di Taitas la vigwe Dalmesia. Dimas vông nilô la vô susu kibun ga om sea a dô di la vigwe Tesalonaika. <sup>11</sup> Luk tîbed wê dô hixôn a. Om ông loc kô Mak di muu lam vô a, ên Mak tiyi wê ob ngîdu a xôn vac yuac ge. <sup>12</sup> Tikikas ge, a vông i la Epesas.

<sup>13</sup> Ilage wê a la vigwe Tloas ge od a sea a saket levac dô vac Kapas ben. Om buc wê ông obêc lam vô a ge od ông loc kô a saket tige mi lam, di kô a kîpihac hixôn, di le i lêc lungên a kîpihac wê he vông ya bwoc ninîvi ge lêm. Nge, ông kô kîpihac vîhati mi lam hixôn.

<sup>14</sup> Aleksanda wê vông yuac lec ain siên ge vông nîpâên levac vô a, om Anutu obêc vông

myaviwen nipaên vô i lec nipaên wê i vông vô a ge. <sup>15</sup> Om ông êno, ông viac ông ên xomxo tige, ên xêyaa vô myavinê ên nêb ob le vac kiyang nivihha wê il mi nêl ge xôn.

<sup>16</sup> Vô buc wê a la le vac kot taxlee ge, xomxo ti o le hixôn a di nêl kiyang wê ob ngidu a xôn ge lêm. Nge, he vihati sea a dô. Mêlêc a kitaa vô Anutu ên a nêbê i kitya he nêl nipaên wê he vông vô a ge vêl. <sup>17</sup> He vihati sea a mi la, lêc Apumtau dô hixôn a di vông xêkizêc wê i vông ge vô a, om a nêl Kilisi xolac vihati yêp seac di tibii madiluhu wê lam le vac kot ge vihati ngô. Om tiyi xocbê Anutu vô a vêl ên noo laion mya. <sup>18</sup> Apumtau obêc vô a vêl ên nipaên vihati wê xomxo nêb ob vông vô a ge, di obêc kô a mi la vac ben lag puunê di obêc viac a luta. Om il ob pimil i lê i yêp luta lêc luta. Nôn.

<sup>19</sup> Ông nêl vô Akwila yuu vinê Plisila hixôn Onesipolas he vinê nue bêga bê a nêl vidiiên vô he. <sup>20</sup> Elastas gên dô vac vigwe Kolin, di Tlopimas vông yidac ti om a sea i vac vigwe Mailitas mi i dô. <sup>21</sup> Ông seb lam vô a lutibed, di le i lêc bin buc wê lun yuu ningigooên ob val lec ge lêm. Yubyulas yuu Pyudens di Lainas yuu Klodia hixôn lime vông vinên vihati vac vigwe tiga, he nêl vidiiên vô ông.

<sup>22</sup> Apumtau i ngidu ông xôn, di vizid nivihha wê i vông ge i viac xam vihati.

**Yesu Xolac**  
**The New Testament in the Patep Language of Papua**  
**New Guinea**  
**Nupela Testamen long tokples Patep long Niugini**  
copyright © 1986 Wycliffe Bible Translators, Inc.

Language: Patep

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-14

---

PDF generated using Haiola and XeLaTeX on 22 Feb 2024 from source files dated 31 Aug 2023

3d2c844d-4bc8-590b-bbf2-3a5fcd1f7ad8